

Դաս 36. «Սասունցի Դավիթ» էպոսի կերպարները: Սանասար և Բաղդասար, Մեծ Միեր

Սասնա Դավիթ

(հատված)

Սասուն երբ շինեցին պրծան, Սասանսար դիմեց աղբորը.

– Բաղդասար, արի գնանք ծով, մի լավ ձի ճարենք մեզ համար:

– Ծովածին էին, գիտեին, որ հրեղեն ձի կա:

Ելան, գնացին ծովափ: Սանասարը ասաց.

– Արի՛ քայլենք ծովի վրա, տեսնենք մարդ կարո՞ւ խրվի ծովի մեջ:

Բաղդասարը թե՛

– Չէ՛, ախպեր, հոգին քաղցր է. ես ինձ չեմ թալե ծով:

– Լավ, դու սպասիր էստեղ, ես կերթամ:

Աստծու հրամանով ծովը ձեղքվեց:

Սանասարի աչքին չոր գետին էր, Բաղդասարի աչքին՝ ջուր...

Սանասարը ծովի միջով, ոնց որ ցամաքի վրա, գնաց, գնաց, հասավ խորքը: Էնտեղ մի պարտեզ կար, մեջը՝ ավազան: Մի պալատ կար, առջևը շատրվան էր խփում: Էնտեղ կապած է ծովածին, սաղափի թամբը վրան: Թուր Կեծակին թամբեն կախած: Պարտեզի մեջ կար մի ժամ: Սանասարը մտավ ներս, քունը տարավ, ընկավ գետին: Մայր Աստվածածինը էնոր երազ եկավ, ձեն տվեց.

«Այ Սանասար, վեր կաց: Խաչ-պատերազմին էստեղ է, յոթ ծունր աղոթք արա իր առջև, արժանացար, կիջնի քո

աջ թևին, քո վրա էլ ոչ մի զարկ չի բանի: Էստեղ է ծովաձին, անունը՝ Քուռկիկ Ջալալի, թմբած է, սանձը բերնի մեջ, արժանացար՝ կհեծնես»...

Սանասարը դուրս եկավ ժամեն, մտավ ավազան, լողացավ, էն աղբրի ջուրը խմեց ու նորեն քուն մտավ: Քնի մեջ Աստծու հրամանքով, զորեղացավ, դարձավ հրեղեն... Խաչ պատերազմին էլ իջավ էնոր աջ թևին վրա: Սանասարը մոտեցավ Քուռկիկ Ջալալիին, առավ Թուր Կեծակին ու պիտի հեծներ: Քուռկիկ Ջալալին լեզու առավ, խոսեց.

- Միտդ ինչ է, Սանասար:
- Քեզ պիտի հեծնեմ:
- Քեզ կտամ արևին, կվառվես:
- Ջրեղեն եմ, կխաղամ քո փորի տակ:
- Քեզ գետնովը կտամ, կերթաս անդունդ:
- Հրեղեն եմ, կխաղամ քո մեջքին:

Սանասար հեծավ: Ձին վեր սուրաց, որ հեծվորին արևին տար, վառեր. հեծվորը խաղաց էնոր փորի տակ: Ձին վար սուրաց, որ հեծվորին գետնովը տար, տաներ անդունդ, հեծվորը բարձրացավ ձիու թամբը... Էն ատեն խելոքացավ, հնազանդվեց, ասաց.

- Դու իմ տեր, ես՝ քո ձին:

Նաիրի Զարյան